

四庫全書

史部

欽定四庫全書

欽定石峯堡紀畧卷十三

六月二十九日壬子福康安奏言臣與海蘭察五  
岱旺沁班巴爾等帶同巴圖魯侍衛督率官兵直  
至石峯堡前進攻賊人不敢出堡迎拒仍於壕內  
藏匿死守查官兵所佔各山梁拿立營盤周圍石  
峯堡約有數十里除山勢陡險溝壑峭立賊匪不  
能越過外其餘兩營中間空處尚多恐賊人從此

竄越現又抽掣兵丁多放卡座開挖溝壕以期益加嚴密至賊人取水係在石峯堡西南礮下河甚寬廣貼近堡邊我兵尚不能進前斷絕現選派好鎗手在彼伺賊人下礮即放鎗擊打臣等公同商酌惟有將石峯堡東南山腿佔得即可一面設法斷其水道一面乘勢進逼賊巢無難制其死命但此係賊人最要處所必拚命抵禦官兵仰攻恐一時不能得手必須整頓兵力計出萬全現在保寧

成德帶領屯土兵丁已於二十一二日陸續到齊  
該兵丁等攀陟山路是其所長且又善於攻撲原  
擬稍為休息即合力進剿而賊人詭詐亦料及官  
兵必來攻佔隨於二十二日有賊人聚集山梁刨  
挖溝壕意欲拿卡臣與海蘭察商酌乘此賊人不  
備分兵進攻可以痛加截殺因與旺沁班巴爾保  
寧成德蘇靈法靈阿泰斐英阿福寧等帶同巴圖  
魯侍衛章京率領屯練及各營奮勇官兵分路上

攻賊見我兵進撲勢猛拚死抵禦而堡內賊匪亦  
紛紛接應下壓數次我兵奮勇直前鎗箭齊發殺  
死賊人百餘名賊始遁回堡內藏匿壕中放鎗投  
石竭力抵禦惟時官兵已至壕邊因其所挖壕溝  
寬深一時不能越過恐久站多有損傷是以徐徐  
撤回此次打仗屯練陣亡一名帶傷官兵數名雖  
未能趁勢攻得賊堡然邊截剿殺已足喪賊人之  
膽至連日各營官兵搜獲及百姓擒獲賊匪男婦

一百餘名又華亭西和秦安等縣盤獲賊匪五十餘名除訊明無關緊要即行正法外內有賊目馬壯父子及稍悉賊情數名暫留訊明起解

福康安又奏言查固原州回匪馬昇貴馬漢龍於靠城屋內私挖地窖一案經前督臣李侍堯飭委平慶道沈鳴臯提犯究訊茲據該道嚴加刑訊錄供詳報緣馬昇貴與逆犯田五素相熟識私習邪教自四十六年查禁之後仍與田五往來本年閏

三月內田五糾合謀逆馬昇貴與伊子馬漢龍均允從入夥因伊孫馬如林馬如海現充營兵恐將逆謀漏洩並未告知該犯隨令伊婿王舍而巴等將院內堆糞地窖開挖寬深以便起事時藏匿家口衣物馬漢龍亦於所居院內開挖土井預備藏匿衣物並非潛通地道等情並將該州所繪地窖圖樣呈送前來臣詳加閱看馬昇貴於關廂壕外開設駝廠馬漢龍住居關廂相距三百餘丈中有

城壕民房間隔非一時所能開挖通連但馬昇貴  
膽敢與逆犯田五私習邪教往來糾合與伊子馬  
漢龍均允從入夥逆跡顯然是其開挖地窖土井  
必另有詭詐情弊且據圖開馬昇貴所挖地窖進  
長三丈五尺除供出伊壻王舍而巴等幫同開挖  
之人均應逐一嚴究從重辦理又所供伊孫馬如  
林馬如海現充營兵並未告知之處亦不足信臣  
現飭臬司陳步瀛親提各犯嚴加刑鞫並委員赴



該處覆加踏勘務令從實吐供毋任絲毫狡展至馬昇貴等與逆犯田五傳習邪教交通謀逆李侍堯漫無覺察其罪實無可逭該州知州於所屬回民謀為不軌置若罔聞亦應嚴叅治罪臣已飭令臬司陳步瀛詳晰訊明年月並將此案是否係現任知州王琮盤獲抑係該州已經抵任事後查拿及並非王琮盤獲之處逐一查訊明確再行據實具奏

福康安又奏言底店武舉馬文熹率衆從逆攻擾  
城池刦掠村莊實屬罪大惡極原不得因其悔過  
投順稍為寬減臣前欲解散賊黨是以權宜允准  
留於軍營時加防範俟剿滅賊匪即行解送熱河  
預備審訊臣曾面訊該犯以伊名列武榜身受

國恩何竟甘心從逆據供實係被賊逼迫無奈順從  
曾於五月十七日遣人將危急苦情於隆德縣案  
下稟過等語臣復詢之隆德縣知縣鍾潤據稱實

有此事並將馬文燾原稟呈出問以曾否稟過前任督臣李侍堯則稱馬文燾已於十八日率衆從逆是以因循未稟等語臣思該縣如果將馬文燾赴訴情節稟知督提或設法撫諭慰安尚不至公然肆逆為賊人又添羽翼乃沉擱不報實屬昏瞶糊塗貽誤要務應請

旨將隆德縣知縣鍾潤革職拿問以便審明治罪所遺員缺前奉

諭旨候補吏目朱爾漢以佐襍微員能將靖遠縣內應  
賊犯用計妥速按名擒拿甚屬可嘉事定後即將該  
吏目出力之處聲明送部引見此時若有知縣缺出  
即可委署欽此該員現已調至軍營臣留心察看甚  
有才幹係佐襍中出色之員應即委署隆德縣知  
縣於衝途要務實有裨益

福康安又奏言查官兵進剿逆匪自抵隆德縣後  
卽次拿獲活口及投出回匪除於軍營審明正法

外尚有二百三十餘名俱經陸續解交隆德縣收禁嗣以此等俱係曾經從逆之犯人數衆多未便久羈囹圄經臣飭令臬司陳步瀛即於解到各犯內擇其人稍明白稔悉賊營情形者酌留數人解京備訊仍嚴行鎖鑰毋致稍有疎失其年歲幼小者暫行羈禁聽候酌辦外其餘各犯審訊明確一面錄供詳報一面即行正法茲據該司稟稱軍營解到人犯前後共二百三十九名遵即逐一提訊

除馬世忠劉天祿馬成格惠明見四犯畧知賊營情形俱嚴行鎖鑰留備解京馬元一等四十三名均年歲幼小暫行監禁候辦外其餘蘇進魁等一百九十二名俱訊係久經從逆情罪重大之犯均應概予駢誅隨於六月十四日飭委平涼府知府王立柱慶陽府知府王彛憲鎮原縣知縣胡謨會同都司楊宗澤等將該犯等均行處斬訖並密飭該縣預掘大坑三處派撥弁兵週圍防護每起十

名分作三處辦理該犯等俱俯首就戮民情快忭  
等語臣覆加查核謹將業經正法并暫行監禁各  
犯分別開列清單進

呈均奏入

上命軍機大臣傳諭阿桂福康安曰據福康安奏現在  
多放卡座開挖溝壕俟將東南山腿佔得即可設法  
斷其水道並乘勢進逼賊巢等語所辦均為妥協惟  
所稱賊人取水係在石峯堡西南砌下河甚寬廣貼

近堡邊我兵尚不能進前斷絕現選派好鎗手伺賊  
入下礮即放鎗擊打等語此亦係一法但恐賊人仍  
於官兵防範不到之時又復乘間下礮取水得資接  
濟不免耽延時日所慮尚未為周密朕意既在石峯  
堡礮下或係泉水亦未可定即係河水阿桂福康安  
亦可設法派員前往囊沙遏其上流或竟開溝將下  
流瀉往別處使賊無從汲水豈不更善著阿桂福康  
安即商酌妥辦至此時賊勢已威藏匿堡內不過苟



延殘喘官兵進剿自應計出萬全不必欲速以致兵  
丁或有損傷現在阿桂所帶京兵早抵軍營屯練降  
番亦俱到齊阿桂與福康安會同商辦兼之大兵雲  
集賊人聞風膽落無難迅速殲除若已將賊匪剿捕  
淨盡固屬甚善倘賊竟敢仍前死守官兵四面圍堵  
絕其竄逸之路賊人糧食匱乏又無從取水飲食俱  
絕自可不攻而潰阿桂福康安此時轉宜倍加慎重  
不必輕進即如屯練甫經到營打仗即已陣亡一名

殊屬可惜著阿桂福康安優加賞恤其餘屯練降番  
奮勉可嘉前已有旨賞給錢糧一月著再賞給一次  
以示獎勵至現在尚未出伏天氣炎熱朕心甚為軫  
念恐官兵或致傷暑業經由驛發去御藥房所製定  
中平安丸藥各二千丸以備散給官兵祛病之需福  
康安接到後仰體朕意如何分散及該處氣候何如  
並著奏聞以慰厯念又據奏馬昇貴家內所挖地窖  
深長至三五丈不等斷非數人所能開挖其所供並

未告知伊孫馬如林馬如海之處亦不可信著傳諭  
阿桂福康安於事竣後親往履勘並將各犯等種種  
謀逆情由訊訪確實究出黨羽按名查拿嚴辦勿稍  
姑息其挖窖年月以及該州王琮是否自行盤獲之  
處亦當逐一秉公確查據實覆奏至馬文燾既在縣  
具稟該縣鍾潤即當善為慰諭並曉以不可從逆大  
義或將馬文燾傳到縣中扣留以遏其從逆之謀何  
得一無辦法惟以馬文燾次日即行從逆為詞為沉

擱不報卸罪地步著福康安即將鍾潤革職拿問委  
員迅速解赴熱河審明治罪並將馬文燾原稟一併  
進呈又據奏馬世忠等四犯畧知賊營情形預備解  
京等語馬世忠等既知賊營情形則起事根由該犯  
等亦必知悉福康安曾否向其詳細研鞫著即錄供  
據實覆奏朕前降諭旨令將拿獲賊目解送審訊亦  
不過欲明白賊人起事原委並究出勾結賊黨以便  
盡法懲治若解送之犯太多沿途照料恐難周到除

馬文燾馬昇貴馬漢龍等已有旨諭令解送外著傳諭阿桂福康安嗣後拿獲賊犯止須揀其緊要頭目如馬阿渾大通阿渾張阿渾數人可備審訊者解送熱河訊供其餘卽於軍營一面審明起事根由錄供具奏一面卽行正法勿任稍稽顯戮其監禁年歲幼小之賊屬馬元一等四十三名俱係應分賞為奴之犯但福康安係陝甘總督及本省地方文武各員均不可分賞致犯屬仍得留於甘省此外如五岱暨巴

圖魯侍衛等事竣後回京以及別省在甘協勦之員俱可各分賞一人為奴倘將來拿獲幼小犯屬尚多即可賞給屯練降番各兵丁為奴令其嚴加役使也至浦霖因其究係生手是以將伊調任安徽陳步瀛此次籌辦一切尚屬周妥已將該按察使簡放甘肅布政使福康安就近委辦各件更當得力

同日福康安又奏言查五岱等前經帶兵於伏羌雲霧山數次剿賊甚多誠如

聖諭頗有起色臣留心體訪彼時雖係五岱總理軍營  
事務而一切皆公同商酌辦理其伏羌擊退賊匪  
係剛塔帶兵先到至雲霧山首先帶兵進撲搶得  
賊人所佔山梁奮勇殺賊則係阿爾薩郎與剛塔  
蘇靈三人最為出力李侍堯亦知畏懼同五岱帶  
兵策應皆由屢奉

諭旨訓飭誨示是以人人皆知愧奮感激精神漸能振  
作奏入報

聞

三十日癸丑

上命軍機大臣傳諭阿桂福康安曰此次逆回滋事前據剛塔李侍堯奏稱首犯係小山田五但思田五於上年冬本年春間始製辦矛子庫刀等物而現據福康安查明賊人於四十六年即修理石峯堡上年又加葺整固是其逆謀轉在田五之前况田五居住小山離石峯堡約有二三百里之遙安能遠赴該處兩



次興修且石峯堡為賊人巢穴其中所有糧食器械等物自必以漸存貯備辦田五既不居住該處平時又有何人在彼製造運貯調度一切看來田五亦不過賊中頭目如張阿渾楊填四者特因舉首有人該犯知逆謀敗露遂爾先行舉事倉猝生變若該犯果屬賊首則伊既經自戕賊衆即當紛紛潰散安能復行四處勾結即云田五斃後賊營內尚有李鬍子馬鬍子二人諒該二犯彼此不能相下則石峯堡底店

之賊又安能咸聽其指使其中必另有為首之人為賊衆所服從一切修堡挖窖打造器械蓄積糧食等事俱係該犯主謀暗遣黨羽分投備辦並訂期起事此係勦辦逆回第一緊要情節福康安既拿獲賊目馬壯父子等何不向其詳細訊明著傳諭阿桂福康安務即將拏獲賊犯嚴訊此事究係何人為首之處迅速錄供具奏至馬文燾曾於五月十七日遣人赴隆德縣稟報朕初意尚欲免其一死但思該犯於十

七日赴縣具稟十八日即率衆從逆明係甘心附賊故投此稟以為日後被獲時卸罪地步不然即係馬文燾知該縣鍾潤懦怯無能故以此恐嚇懈其隄防而該縣亦即被其嚇詐茫無措置所有該犯原稟甚關緊要著傳諭阿桂福康安即速查出由驛進呈至所稱馬文燾十八日從逆之處究係如何情節或係該犯率衆前往石峯堡迎賊或係帶同賊人攻擾城池著阿桂福康安再會同逐一研訊務得確情勿任

絲毫道飾

七月初一日甲寅阿桂福康安奏言竊臣阿桂自  
豫入秦一路民情甚屬寧貼茲於二十三日行抵  
軍營將石峯堡形勢詳加察看該處在萬山之中  
三面皆係懸崖峭壁惟東南山包地勢稍平為賊  
人門戶賊匪四處挑挖深壕數重以圖據險自守  
惟有仰遵

訓誨四面圍攻嚴密堵截前經臣福康安與海蘭察等

籌辦於周圍各山梁安營二十餘處分派將領帶  
兵駐守俾聲勢聯絡並於營盤相隔處所多放卡  
座剗挖溝壕期於彼此接連使賊人無路可竄已  
屬周妥臣思賊人佔居石峯堡為負隅死守之計  
若率大兵從堡前進撲勢屬仰攻且上有深壕數  
重賊人藏匿壕內放鎗投石恐損傷官兵轉失威  
重惟有將攻圍之處愈加逼近設法斷其水道用  
大砲轟擊賊營製造火彈拋擲賊壕焚燒令其不

能藏身預先派定各路官兵俟有可乘之機即合力進攻一鼓殲擒可期得手至賊巢內男婦聞有數千其糧食係從附近村庄搶掠運回藏貯想亦無多而此時周圍俱有官兵亦斷無為賊賫送糧食之人不能支持多日且將來水道一斷更可不敢自潰臣揣度事勢尚易集事至賊匪起事之初似以蘇四十三前事為戒不肯坐守一處四出煽誘勾結攻擾劫掠竄徙不定出沒無常而其將家

口先送至石峯堡究以此為巢穴今既計窮力竭  
釜底苟延則仍不出蘇四十三死守華林之故智  
數日內汲水之路一斷石峯堡即成絕地此皆逆  
犯罪大惡極天奪其魄故得聚而殲旃此外各處  
雖尚有零星賊匪業經臣福康安派兵前往搜捕  
連日官兵搜獲及百姓擒送者絡繹不絕總之巢  
穴一傾餘黨自無難勦除淨盡再臣阿桂由陝入  
甘沿途所見庄稼彌望青葱臣歷數從前往來甘

省九次未有如此之茂盛民情歡躍定致綏豐臣  
福康安身任地方尤深慶幸奏入

上命軍機大臣傳諭阿桂福康安曰據阿桂等奏阿桂  
於二十三日行抵軍營察看石峯堡形勢惟有將攻  
圍之處愈加逼近設法斷其水道用大砲轟擊賊營  
製造火彈拋擲賊壕焚燒令其不能藏身等語前以  
賊勢已威諭令阿桂福康安此時轉不必欲速宜籌  
畫萬全總以賊人悉數殲擒官兵不致傷損方為妥



善現在續派京兵俱已前赴甘省協勦兵力愈多想  
勦除更易至賊雖挑挖深壕以圖據險自守官兵何  
不拏柵前進從前阿桂平定金川時即用過此法若  
可照辦阿桂福康安即當妥酌辦理並遵前旨派員  
前往賊人取水處所於上下流囊沙開溝將石峯堡  
下之水瀉往別處則賊人水道一斷有食無從下咽  
更可不攻自潰至用砲轟擊並拋擲火彈雖亦係一  
法但究以生擒一二人俾得訊明起事根由及從逆

黨羽以便盡法懲治況賊勢日就窮蹙凡所脅從者  
豈肯尚為之抗拒堡內糧食又豈能供數十人之坐  
食是賊衆方將畏懼思散阿桂福康安何不趁此權  
為安撫俟其出降將緊要賊目生致一面訊取起事  
主謀根由一面解送熱河備訊但受降如受敵阿桂  
福康安仍當慎之又慎至石峯堡賊匪勦盡後阿桂  
福康安務遵前旨趨京兵及山陝各兵撤回之便或  
即就近親赴底店固原等處將賊人種種逆蹟詳細

履勘並究出黨羽按名拏辦阿桂等務須逐一妥辦  
剷絕根株以靖地方不特福康安係陝甘總督責任  
綦重即阿桂既承辦此事亦斷不可急於完事稍為  
姑息也

上又命軍機大臣傳諭阿桂福康安曰阿桂行抵石峯  
堡軍營迄今已數日於此次逆回滋事李侍堯剛塔  
二人辦理貽誤之處自必訪詢確實朕意此案剛塔  
之罪尚輕於李侍堯緣從前蘇四十三勦滅後所有

善後一切即責成李侍堯妥協辦理乃前據福康安查奏賊匪於四十六年即修理石峯堡上年五月又加葺治整固而各處逆回訂期起事亦衆所共知且甘省回民平昔恣肆豪橫欺凌民人等語李侍堯在各省總督中素稱明幹今回匪如此逆謀彰著伊非不能覺察嚴辦者何至安坐省城竟同聾瞶況甘省回民雖多亦當設法籌辦豈得以希圖目前無事致令日益放縱釀成事端乎是李侍堯之恭賊養癰始

終貽誤朕亦不能曲為之解至剛塔在馬家堡放賊  
翻山逃竄四出滋擾唯知在後尾追毫無籌畫是即  
其罪無可追但伊甫任固原提督田五等即被首舉  
事尚能射賊受傷又雲霧山打仗時剛塔與阿爾薩  
朗蘇靈三人最為出力罪尚可原特其從前疎於防  
範之處咎實難辭而較之李侍堯究可稍從未減也  
朕所見如是著阿桂再會同福康安秉公詳查務歸  
至當以憑定讞

同日圖薩布奏言竊臣於六月十一日將頭起京  
兵護送出陝境茲查二三四起官兵均間一日按  
站抵陝其應需車馬驛頭臣督同地方官如數應  
付凡遇尖宿站所一切店舍食物悉係寬為預備  
隨到隨即安頓供支現當伏雨時行臣誠恐灞澮  
涇渭等河水勢漲發復經多調船隻水夫按起設  
法過渡兼之兵丁乘騎長驛行走較為便捷沿途  
無滯各起兵丁俱屬歡欣前進極為安靜今臣護

送第四起官兵於六月二十四日抵長武臺次早  
照料起程前赴甘省訖查此次赴甘京兵應用戰  
馬以及鑼鍋帳房箭枝等項俱經撫臣畢沅在於  
西安滿營挑備解送現又辦解乾糧俾資裹帶其  
火藥鉛丸尤為軍前急需之物臣隨將前次解貯  
長武備調藥鉛火繩亦即就近派委員弁管解隨  
同末起京兵運往餘再陸續撥運以裕軍用至近  
日官兵圍攻石峯堡逆回困守巢穴日就窮蹙釜

底遊魂指日即可洗戮以彰

國憲臣已飭令各軍臺多挑壯健馬匹預備馳遞捷  
音再陝省東西大路州縣皆有回民聚處臣沿途  
察看現俱安分守法併各處百姓聞賊回日就誅  
鋤人心痛快愈覺安堵如常足以仰慰

聖懷

同日王昶奏言臣竊查長武一路為通甘省涇州  
大路現當進剿逆回一切官兵過境及遞送軍裝



等項皆由於此所有應用車馬等項必須先事預籌庶不至稍有遺悞臣自抵長武查看沿途馬匹均為臆壯足數而額設人夫亦皆足資運送查自五月以來先經甘省調出提標西鳳各營嗣後派調西安滿洲駐防及軍標撫標最後山西官兵共計六千名或間日一起或每日一起均已照例供應陸續馳赴軍營至京師勁旅來抵潼關先經撫臣議於華陰首站給與長騾直入甘境又經藩司

圖薩布沿途照料臣亦督同各站員分設飯棚營盤以資官兵飯食住宿是以迅速趨行極為安靜今於二十五日業經全數過境前抵涇州至此次甘省軍需多資陝省協濟三旬之內共計解出採買協甘站馬兩次一千匹又挑赴軍營戰馬一千匹以及火藥鉛丸大小砲位帳房箭枝乾糧炒麵餉鞘錢文等項為數繁多俱係軍營要件臣即於各官兵行走之暇撥給車馬或直送軍營或分別

留貯平涼一帶俱已源源飛運足供應用至於往來文報尤關緊要臣嚴飭各站臺員弁亦皆按照時刻晝夜星馳並無稽滯均奏入報

聞

初三日丙辰

上命軍機大臣傳諭阿桂福康安曰現在逆回將次辦竣而查辦賊黨為善後第一要著此次田五等聚眾滋事即係蘇四十三勦滅後李侍堯辦理未盡所留

餘孽將來阿桂福康安查辦匪黨時自當剷絕根株  
永除後患但若因回匪滋擾遂槩行查辦轉非綏靖  
地方之道此事不可不慎重辦理阿桂福康安俱係  
能事之人又在彼親見一切情形自必預為籌計此  
時官兵已將賊犯圍住不值輕進想竣事或尚需數  
日著阿桂福康安公同熟商務將除盡孽根奠安良  
善一勞永逸之計妥議具奏至阿桂等前奏賊人於  
堡外四處挑挖深壕賊既挖壕自守官兵又四面圍

堵自不能復往外尋覓糧食其堡內賊衆男婦不下數千人從何得食且數千人從何而進即云從前在附近村店搶掠藏匿亦豈能似此支持多日明係平時陸續運貯多蓄盜糧李侍堯固不能辭養癰貽患之罪而該處地方官漫無覺察其罪尤不可追已節次傳諭阿桂福康安查明叅奏此時阿桂等既須相機進勦即當於籌辦之暇就近將賊人修堡聚糧各情節係何員任內之事逐層查訊確實先行叅奏治

罪

初四日丁巳阿桂福康安奏言臣等攻圍石峯堡賊巢安卡挑壕斷賊水道現在公同商酌周視地勢賊人取水係在石峯堡西北及東南崖下兩處河流貼近堡下山邊惟有將石峯堡西北東南山腿佔得即可斷絕賊人水道並遵照

硃筆圈出指示之處選派官兵拏卡進逼周圍刨挖溝壕一道彼此接連再加一層堵圍愈益嚴密賊匪

斷不致有一名免脫但此係賊人性命所係必盡  
力守禦須整頓兵威乘勢勦殺並多備鉞鍬人夫  
一面預備打仗一面挖壕拏卡因於二十五日寅  
刻發兵臣福康安與海蘭察五岱旺沁班巴爾保  
寧成德三德蘇靈阿爾薩朗法靈阿泰斐英阿福  
寧明亮春寧等帶領巴圖魯侍衛章京率領京兵  
各營奮勇官兵阿拉善兵屯練降番老教土兵分  
隊預備臣阿桂督催策應卯刻我兵搶至堡前堡

後遂將西北東南兩處山腿佔得賊匪並不敢出  
堡迎拒維時海蘭察帶同明亮春寧巴圖魯侍衛  
各員等將所領官兵埋伏兩旁溝壩之下乘賊追  
壓繞出從中攔截即可痛加勦殺因催令兵夫立  
持鋤鋤刨挖溝壕逆料賊匪見挖壕斷伊水道定  
形惶急且止係人夫無兵保護自必乘間下壓希  
圖衝散我兵即可突出勦殺不但制賊死命亦誘  
賊之一法無如賊人自恃有深壕數重諒官兵一



時不能超越仍藏匿壕內放鎗投石始終不敢出  
迎我兵遂一面拏卡一面挖壕申刻雷雨大作亦  
未少休並恐賊人乘雨下衝益加嚴整自辰至戌  
周圍石峯堡十餘里共拏卡二十餘座剗挖溝壕  
一道深寬各一丈四面接連即派奮勇官兵及川  
省屯練令駐各卡堵守又防賊人於夜間衝突鋌  
而走險海蘭察等於京兵及阿拉善兵內選派好  
鎗手數百名排立預備終夕巡察稽查賊匪亦毫

無動靜至賊人取水處所在官兵卡壕之外賊匪斷不能越過偷汲即遇天雨用器皿接取量亦無多且山形陡凸並無溝坑不能存積斷難供數千人飲用數日之內定形渴憊此時派兵進撲亦可期得手但恐困獸猶鬪我兵轉有損傷惟有仰遵訓諭倍加慎重計出萬全總期賊人不致一名逸出再查石峯堡四面並無石峽賊人欲將官兵誑入之語俱係傳聞毫無確據從前傅玉所駐鹿鹿山係

石峯堡南面相隔有二十餘里僅可以牽綴賊勢  
今臣等搶佔石峯堡山腿周圍挑挖溝壕竝立卡  
座逼近石峯堡賊人所挖溝壕不過一鎗所及之  
地現在石峯堡西北山包已派五岱阿爾薩朗帶  
同侍衛官員率兵嚴防其東南山腿海蘭察帶同  
巴圖魯侍衛同明亮等在彼駐守嚴防臣福康安  
復不時往來巡查統計四面卡座溝壕周圍不過  
十里每日可以稽查數次呼應實為迅速賊人斷

無從竄逸

阿桂福康安又奏言查底店回人前見官兵勢盛乞降其心實為巨測臣福康安當即派兵將投出之二百餘犯分起押解隆德縣交臬司陳步瀛收禁因人數較多飭令該司審明後即同節次拏獲賊匪在該縣分別正法至底店乞降之土著回民雖名為投順究係俱經從逆之犯已於移營石峯堡時酌留俞金鰲帶兵在彼駐劄彈壓俟賊巢掃

滅時遵照

諭旨於京兵及山陝各兵撤回時將該犯等及伊家屬  
分別辦理務使從逆之犯殲誅淨盡良善回民不  
致聞而驚懼方為妥善統俟酌定機宜再行具

奏至馬文燾一犯身係武舉膽敢與逆回交通勾結  
雖自行投出法所不赦臣福康安現已遴派精壯  
兵弁護解熱河以備審訊均奏入

上命軍機大臣傳諭阿桂福康安曰官兵已于二十五

日將石峯堡西北東南兩處山腿佔得週圍十餘里  
共拿卡二十餘座剗挖溝壕一道四面接連堵守賊  
人取水處所在官兵卡壕之外賊匪斷不能越過偷  
汲阿桂等辦理均為妥協想捷音定在早晚間矣此  
時賊勢愈感自不虞其詐降生變但更當嚴防如賊  
見官兵圍急出堡乞降阿桂福康安竟不妨權為安  
撫轉可得其為首活口以便嚴訊致反真情若徒事  
派兵進攻如從前勦辦蘇四十三時概行殲戮反無

從詳細審訊盡法懲治也又另摺奏稱底店回民均有從賊逆蹟俱不可赦宥俟京兵及山陝各兵撤回時再行相機籌辦所慮甚是阿桂福康安於石峯堡辦竣後即可趨京兵及山陝各兵撤回之便赴該處詳悉查辦仍遵前旨將拿獲賊犯嚴究起事各逆謀如有被賊供出者不論蘭州河州各處匪黨務即指名拿辦以淨根株不可稍存姑息至馬文燾一犯前已有旨派法靈阿迅速解送熱河諒此時阿桂福康

安早經接奉前旨將馬文熹嚴加鎖鑰交法靈阿妥速解送也

上又諭內閣曰此次老教土司兵一經檄調隨征俱各爭先奮勉自當從優支給口食以示體恤況該土兵等與屯練降番相仿屯練等月支既已優厚所有檄調隨征之老教土司兵丁應得分例亦著加恩照屯練降番之例一體支給其上屆勦除撤拉爾逆回曾經支給之項並著該部查明一律准予開銷用昭朕



軫念土兵優加體卹之至意

臣等謹按老教土兵與逆回生共鄉閭見其肆出  
滋擾同深義憤敵愾爭先一經檄調踴躍前驅  
非若屯練番兵遠赴征調應優支口食也乃蒙  
我

皇上特降

恩綸照屯練等月支之例概令從優支給豈惟一視同

仁抑且

鴻施逾格凡夫宣力戎行者人人感奮挾纊騰歡所以  
士氣揚而賊氛迅掃歟

同日阿桂福康安又奏言查沂隴一帶此時斷無  
虞賊人竄往自可毋須屯駐多兵臣等公同商酌  
即將太原鎮福敏泰所帶兵二千名行令撤回本  
省就現在情形而論掃蕩賊巢之後其賊匪經過  
地方所有曾經從逆之犯必須竭力搜捕痛加殲  
戮不得量留多兵以資彈壓是以此時軍營兵

力雖屬有餘臣等未即議撤卽敷倫泰所駐汧隴一帶地方現尚有敗逃餘賊經該處拏獲者是以仍令暫駐俟酌看光景再令撤兵回任奏入報

聞

同日福康安奏言竊查甘省自逆回滋事以來軍需一切費用較繁庫貯錢文不敷支用前經李侍堯奏請照乾隆四十六年之例調取陝省局錢一十萬串以備急需臣查各路官兵雲集甘省需用

雖繁亦應樽節籌辦李侍堯原調錢一十萬串為數未免過多現在大兵圍困賊巢尅日可期撲滅撤兵在即尤未便多撥錢文致滋糜費因飭令辦理軍需各員通盤籌算臣復親加確核現在陝省陸續運解錢五萬串儘足敷用臣已咨明撫臣畢沅并札飭藩司浦霖將陝省解到錢文運貯平涼府庫派委妥員專司支放務令核實報銷不致稍有浮冒再軍營糧草最關緊要臣到甘後即多方

籌畫扣筭各州縣道里遠近陸續接運以期無悞  
軍行至火藥鉛彈等項先將各營存貯者運送并  
嚴飭藩臬兩司及各該道府多為籌備上緊督催  
趕辦自進兵以來源源接濟並無缺乏奏入報

欽定石峯堡紀畧卷十三

欽定四庫全書

史部

欽定石峯堡紀畧卷十四至  
十六

中書臣張經田覆勘

總校官檢討臣何思鈞

欽定四庫全書

欽定石峯堡紀畧卷十四

初七日庚申阿桂福康安奏言竊照官兵進逼石峯堡賊巢周圍安卡挖壕斷賊水道數日以來海蘭察明亮等帶兵於石峯堡前又拏卡二座以圖逐漸進逼距賊人所挖溝壕甚近賊匪亦不敢出爭臣等現已將石峯堡層密攻圍賊匪自知無路可出一任官兵拏卡進逼不敢搶撲惟於壕內死

守水道已斷其所畜馬騾已有渴極滾跌下礮者俱為我兵所得雖自到軍營以來每日有陣雨一次為時不久接取無多斷不能供數千人飲用且立秋已將一旬雨水漸少就現在情形而論止湏晴霽十餘日賊回立見困憊無難一鼓殲擒此時大兵雲集不妨小試兵威或賊人自知死在旦夕出堡迎拒即可乘勢勦殺因於三十日發兵臣福康安同海蘭察明亮成德蘇靈泰斐英阿福寧春



寧等帶同巴圖魯侍衛章京率領京兵各營奮勇  
官兵阿拉善兵屯練降番分作三路由石峯堡之  
前東南山腿進攻保寧舒亮阿爾薩朗三德巴達  
瑪率領京兵各營奮勇官兵老教土兵分為兩路  
由石峯堡之後西北山腿進攻臣阿桂同旺沁班  
巴爾永鐸永安在各路督率策應寅刻我兵搶上  
山梁賊匪仍不敢迎拒惟藏匿壕內放鎗投石我  
兵鎗箭齊發並拋擲火彈打死溝內之賊甚多賊

匪亦拚命抵禦不肯潰竄惟時屯練及各路官兵無不人人振奮俱欲鼓勇先登無如山上有數層直礮勢甚陡削即平時攀陟而上尚須喘息數次其稍平處所又有深溝數重阻隔我兵不能得手恐久站多有損傷因於巳刻將各路官兵陸續撤回此次進攻殺死賊人數十名官兵因奮勇上撲亦有陣亡受傷者總兵蘇靈侍衛克臣保鄂爾霍爾圖協領和興額遊擊高人傑汪啓德海哈明阿

俱帶有箭石各傷其傷痕俱輕至賊匪以釜底遊  
魂尚敢負隅死守抗拒官兵實屬罪大惡極人人  
髮指現在臣等惟有督率官兵將溝壕愈加剗挖  
寬深營卡益加嚴密俾賊人不致有一名漏網一  
面劄飭各路帶兵將領及各州縣將零星賊匪實  
力搜捕並曉諭百姓盤獲解送務期淨盡諒此么  
麼小醜斷不致曠日稽誅再前此派往各路鎮將  
會同地方官陸續搜獲賊匪一百數十名內有李

自黨一犯俟解到時審訊明確再行分別解送辦  
理奏入

上命軍機大臣傳諭阿桂福康安曰蘇靈等帶兵打仗  
不避箭石以致受傷實為奮勇可嘉雖據阿桂等奏  
其傷痕尚輕但現在曾否平復著即據實覆奏以慰  
廑念至賊人已經官兵四面圍住斷其水道斷不致  
稽延時日阿桂福康安宜遵前旨倍加慎重不必輕  
於前進即如此次蘇靈等因勦賊受傷已屬不值殊

非持重之道諒阿桂福康安自能相機妥辦俾官兵不致傷損而賊匪盡數殲除也又據奏派往各路鎮將及地方官陸續搜獲賊匪一百數十名內有李自黨一犯俟解到審訊明確再分別解送等語此係要犯著阿桂福康安即訊明錄供具奏至前日官兵由底店進勦時該處乞降回人共有千餘人此等回匪均經從逆自不可赦阿桂福康安于石峯堡事竣後務即帶兵前往詳細分別查辦不可復使一名留於

該處其餘舊教回衆自未便因賊匪等滋事遂爾概  
行查辦前已有旨諭知阿桂福康安但如田五起事  
之小山地方以及賊犯挖窖聚糧各處所阿桂福康  
安務遵前旨親往履勘並一經賊犯供出不論蘭州  
河州各匪徒俱即應行文查拏再此次賊匪滋事到  
處搶劫良民被其傷害者自必不少著阿桂福康安  
于事竣時即查明百姓被賊傷害者共有若干官兵  
打仗陣亡者共有若干及前後殲擒賊匪共有若干

詳細開單具奏

同日阿桂福康安又奏言查奸細徐璠成一犯前經李侍堯盤獲訊供具奏後將該犯交安定縣監禁嗣據該縣稟報徐璠成患病垂斃李侍堯即批令正法已於六月初八日正法訖臣等查閱徐璠成原供雖有欲往蘭州河州勾合之語而其蘭州所欲勾合者何人河州所欲勾合者何人當時既未審訊確實究出姓名住址無憑查拏現已飭令

各該地方文武留心訪察設法躡緝如有曾經與  
賊匪往來勾結之人立即擒拏解送俟拏獲賊首  
再向逐一跟究至賊匪煽誘起事係鹽茶靖遠安  
定會寧伏羌通渭固原靜寧隆德秦安華亭各州  
縣所屬之小山海城官川糜子灘馬營街白馬庄  
馬家堡底店烏家坪鷹窩石白楊嶺蔡家堡等處  
臣等現已分派五岱策卜坦吉蘭泰富祿噶塔布  
阿穆呼朗等帶兵前往搜捕竄匿餘匪俟勦滅石



峯堡賊巢後再於各該處將曾經從逆及形跡可疑者實力查拏痛加殲戮以期淨絕根株其拏獲賊目自當遵照

訓諭詳細研究令將平日往來勾結匪徒逐一供出即

可按名擒拏臣阿桂自啟程後日夜籌畫臣福康

安由途次及到軍營以來往復計慮均無刻不以

此事為念至甘省逆回於蘇四十三滋事之後甫

閱三載復敢于光天化日之下聚眾鳴張攻城掠

堡罪大惡極凡含齒戴髮稍有人心者亦不肯縱  
賊養奸况臣等受

恩深重籌辦善後事宜無論臣福康安身任總督責成  
綦重斷不敢少存姑息復留餘孽自蹈重愆即臣

阿桂既蒙委任倘殲除不盡芽蘖復萌亦無可卸  
責惟是甘省各屬回民居其大半此次逆回起事  
糾合勾連大概總以欲洗回民為詞肆行煽鼓以  
致愚蠢無知各懷疑懼日聚日衆毋論新教回民

相率成羣即舊教亦多有聽從入黨而其中守法良回不肯從賊并協同民人守禦者亦復不少若事後查辦持之太急或奉行官吏辦理不善株連蔓引波及無辜尤屬不成事體臣等惟有仰體

訓諭核實稽查嚴加懲創俾回民知所做懼并酌量事勢于可以完局撤兵時即行奏明撤兵萬不敢少存姑息俾孽種漏網稽誅

阿桂福康安又奏言查黑砣塔井白楊嶺二處匪

徒滋擾前經臣福康安查明以署副將玉柱在彼  
勦捕不能得力令總兵策卜坦帶兵一千名前往  
督率查拏茲遵奉

諭旨已派五岱選帶弁兵迅赴該二處實力搜捕令將  
竄逸餘賊悉數殲擒勿任一人漏網其所管石峯  
堡西北山包營卡舒亮現已到營即令同阿爾薩  
朗三德在彼駐守嚴密防堵至底店從逆投降之  
人共有千餘該處距省城尚有六百餘里長途解

送難免疎虞即分寄各州縣監禁亦須多兵押送  
若中途竄逸又滋事端是以暫示寬容令於本處  
居住酌留俞金鰲帶兵在彼駐劄彈壓臣等現在  
設法籌酌於可辦時即行辦理均奏入報

聞

同日甘肅布政使浦霖奏言竊臣仰沐

殊恩擢授甘肅布政使臣自入陝境以後一路留心察  
看民情俱極寧貼十七十八等日抵甘省之涇州

平涼一帶歲稔時和居民亦俱安堵無恐及至隆  
德靜寧等處漸近賊營城外村庄不無被賊滋擾  
之所仰蒙

皇上蠲租加賑疊沛

恩膏並經督臣委員確勘按戶酌加撫卹其被難流離  
者亦已復還故土且現在官兵大集賊勢漸蹙民  
氣倍增臣於途次目睹該處民人協力搜擒無復  
有畏怖張皇之態臣即于二十日馳抵石峯堡軍

營隨同督臣福康安親探賊巢山勢陡隘尚猶負險自固我兵四面紮營攻圍甚屬周密賊匪已如釜底遊魂現在大學士公阿桂帶領八旗勁旅亦已陸續到營統兵會勦定可盡數殲除無虞竄逸臣奉督臣面諭省城地方緊要將一切應行籌辦事宜詳細告知飭令赴省任事臣即于二十一日自軍營起身經過會寧安定等縣居民安貼行旅無虞但縣屬官川馬營等處俱係賊回出沒之所

恐有逸匪竄匿滋擾情事臣嚴飭文武員弁督率  
兵夫分頭堵截務令盡行擒獲不使一名漏網臣  
於二十七日抵省任事查軍需糧餉係臣專責先  
據各州縣報到糧數臣按冊稽查倉貯均屬充裕  
足敷派撥惟是甘省山路崎嶇運送稍為費力臣  
飭令車騾並運趕緊進行以資接濟至應需銀兩  
現值行軍之際萬難拘泥所有東路一帶州縣臣  
已面囑臬司陳步瀛在于沿途截留兵餉銀內酌



量動支其西路一帶臣即于庫貯銀內按照各州  
縣差務繁簡隨時酌給以期無悞要差仍令實用  
實銷不得稍有浮冒至省城內外要隘各處業經  
原任藩司馮光熊安設堆卡並派撥兵丁民夫分  
地防守布置尚屬周密臣惟督率在省文武各員  
時時親歷稽查分別勤惰予以勸懲總不使賊匪  
竄逸致逃

國憲再城關所住回民十居三四臣于抵省之日約

有回民二百餘人在于關外迎接臣即宣揚

聖諭此次查辦止誅叛逆之犯其餘均屬良民概無波及爾等各安生業無庸疑慮等語該回民等俱感激

皇仁鼓舞歡欣見于形色現在耕市無驚民情寧謐奏入

上命軍機大臣傳諭福康安曰據浦霖奏沿途察看並省城防禦情形一摺尚為明白妥協此時安徽無事

而汪新到甘尚需時日著傳諭福康安酌量情形如該處需員辦事或暫留浦霖在甘肅省城辦理藩司事務陳步瀛仍辦臬司事務庶不致又易生手俟汪新到後再各赴本任可也

初八日辛酉

上命軍機大臣傳諭阿桂福康安曰此次逆回滋事敢於攻擾城池傷害官兵實屬罪大惡極其遺孽即予以寸磔亦所應得但朕心究有所不忍且首從各犯

一律辦理亦未免無所區別前據福康安奏賊人眷屬俱藏匿石峯堡內又向各處裹脅回民入夥令其男口隨同打仗婦女留于堡內作當是賊人巢穴之內老弱男婦正復不少著傳諭阿桂福康安于查辦時所有石峯堡底店賊犯如張阿渾大通阿渾馬阿渾楊填四等為賊營中阿渾者自不應復留孽種其名下幼孩即年未及歲俱當概予駢誅其餘各犯以及被賊擄掠入夥之犯凡男口年在十五歲以下者

著從寬免其一死仍遵前旨賞給別省官兵及降番  
屯練為奴至賊眾婦女如阿渾妻妾亦不可赦宥其  
餘賊犯名下眷口并賊所擄掠婦女雖已從賊者亦  
著免其一死仍遵前旨分賞為奴再前降諭旨令阿  
桂等于挈獲賊日後使其指明供出始行挈究則查  
辦有因良善回民不致疑懼今思若輾轉跟追未免  
人數太多牽引株連將來阿桂等辦理善後時止向  
現獲賊犯隔別研鞫如有供出黨羽即指名出示拘

挈治罪不必又向續挈之犯再令輾轉指供其中倘  
有被賊供出到案後審明實係賊人仇叛者亦當分  
別辦理不可波及無辜如此則匪徒黨羽仍不漏網  
而安分回民亦可不致連累著阿桂福康安即悉心  
妥商據實覆奏至賊人現經官兵四面圍住水道又  
已斷絕萬無生路何以尚敢負隅死守竟無投出乞  
降者况賊營人衆不下數千若非有主謀為首之人  
當此窮蹙之時賊衆豈不立時渙散乃石峯堡內阿

渾又有如許之多而賊衆何以仍前齊心死拒其故殊不可解著阿桂福康安訊訪確實一併具奏

初十日癸亥阿桂福康安奏言竊照官兵自六月三十日分路進攻勦殺賊匪後數日以來臣等督率官兵將周圍溝濠加挖寬過一大深至一大四五尺各處營卡加添官兵嚴密防守用大砲轟擊賊營臣等公同商酌自斷水以來晴霽數日賊匪定形惶急必于黑夜希冀我兵備禦稍懈拚命下

撲或能越過溝濠盜取河水因嚴飭守卡官兵慎  
密嚴防並派巴圖魯侍衛章京周圍巡邏不時偵  
察又派屯練土兵分投埋伏海蘭察明亮等周歷  
各卡往來稽查初一日夜間果有賊匪數十執持  
器械負桶携罐於石峯堡之後潛行下礮未至溝  
邊即被我兵趕上鎗箭齊發殺死甚多割取首級  
三顆生擒二名餘俱受傷竄回訊據供稱一名馬  
伏保係狄道州回民一名馬八四係伏羌縣回民



堡內打仗的有一千多人眷口有數千係張阿渾  
大通阿渾馬營馬鬍子阿渾為頭三十日打仗馬  
營馬鬍子阿渾虎狼口大石溝小馬阿渾俱受鎗  
傷死了堡上有三個水窖遇下雨纔積此水這幾  
日天晴剩得不多大眾怕沒有水吃甚是著急所  
以下來取水至糧食從前在各村庄搶掠運至堡  
內存積甚多還可吃兩個月等語隨將該二犯正  
法訖初二日夜間又有數賊偷下山礮俱被我兵

殺死割取首級初三日賊營內甚露慌亂時聞婦女號哭之聲隨有陸續投出賊回共三十一名訊據供稱俱係靜寧州楊家窪一帶回民被賊裹去其堡內打仗係馬營海城兩處回民居多他們同兩個阿渾每日尚有口水吃係從前積下的再天晴兩三日也就沒得吃了至我們有渴至四日三日者實受不得有數百戶商量投出兩個阿渾不許前後俱有人把守出去即要殺死我們無奈從

兩旁陡礮滾下家眷尚留在堡內也顧不得各等語臣等審明後將各犯即行處斬訖伏思賊匪層密圍定水道斷絕已成釜底游魂斷不至有一名免脫誠如

聖諭官兵轉不必輕於前進以致或有損傷况賊首數名除李自黨現已拏獲其子李可魁即李鬍子已於底店被官兵殺死馬營馬鬍子阿渾于三十日打仗中鎗身死現在首逆止有張阿渾大通阿渾

該二犯如此殘忍不法或者再渴數日衆賊怨極  
內潰將首逆縛獻即可解送熱河盡法處治以伸  
國憲而快人心此即生致之一法臣等惟有督飭官  
兵愈加嚴密防範不肯因賊匪窘蹙稍存大意再  
查要犯李自黨已經解至軍營臣等嚴加究訊現  
就所供情節先行錄呈

御覽至伊供詞有與他犯不甚符合之處因係應解要  
犯未便加以重刑現有拏獲各犯已飭令解赴軍

營侯訊明後擇其明悉賊中情形者與李自黨一併解送熱河預備審訊再李自黨所供勾合各犯臣等查對姓名業經正法者有十餘人其餘雖據供打仗被殺究難憑信仍飭文武各員按名緝拏奏入報

聞

十一日甲子阿桂福康奏言查石峯堡賊人自斷水以來晴霽數日情形惶急屢于黑夜下礮盜

水俱被我兵擒殺初三日有陸續投出賊回三十  
一名俱因渴極困憊私從山礮滾下至初四日投  
出男婦愈多自早至晚已有一千五百餘名臣等  
察看情形其投出人數內婦女幼稚居多男丁內  
亦少精壯者且從石峯堡正門行走並未見賊人  
攔阻逆料賊人詭譎伎倆自知死在旦夕不能照  
管多人任聽受渴困憊之男婦老幼紛紛投出既  
可節省糧食且希冀我兵見賊衆投出防範稍懈

即乘勢撲出以圖竄逸亦未可定且時已日暮尤  
應戒備不虞臣阿桂等令各營卡施放鎗砲將投  
出賊匪打回臣福康安同海蘭察秦斐英阿福寧  
阿滿泰明亮春寧蘇靈及巴圖魯侍衛章京率領  
各營奮勇官兵阿拉善兵屯練降番于石峯堡周  
圍各卡要隘之外層層分布埋伏預備並恐投出  
之逆回五百餘名留在營中倉猝生變因設法於  
糧臺附近處所辦理沿路派兵彈壓將賊匪分作

十人為一起陸續送至該處一面點名一面正法以絕他患至子刻賊首張阿渾果同楊填四等帶領賊匪甚眾寂不作聲一至壕邊將婦女牲畜包裹推入壕內向外直撲大通阿渾帶領賊人在後催促接應思欲捨命奪路竄逃其地正在興奎永鐸永安額爾登保一帶而舒亮三德阿爾薩朗處營卡亦有賊匪撲出我兵鎗箭如雨盡力截殺維時海蘭察即帶同秦斐英阿福寧阿滿泰春寧巴



圖魯侍衛及滿漢屯土奮勇各兵馳往該處自外  
層層圍裹痛加殲戮臣福康安於各路督催照料  
明亮保寧成德圖桑阿額爾恒額法靈阿蘇靈各  
於防守處周密巡邏見賊截殺賊人撲下處所係  
石峯堡南面陡砌地本險峻我兵所挖溝濠又極  
寬深賊匪自相踐踏黑夜力戰直至寅刻殺賊共  
有千餘賊屍積滿壕內河灘山下遍地縱橫張阿  
渾被我兵射傷仍與大通阿渾等竄回堡內其時

天色黎明臣福康安同海蘭察明亮等帶領各路官兵一湧而上復興旺沁班巴爾傳玉等亦督率官兵進堡搜捕擒殺將首逆張阿渾即張文慶大通阿渾即馬四娃及賊目楊填四黃阿渾即黃明馬建成馬良茂馬金玉楊存義馬建幾馬建業馬保全數擒獲此外又生擒餘賊七百餘名割取首級八百餘顆其壕內河中賊屍層積未及割取者尚多計兩日內打仗殲戮及生擒投出正法賊回

共二千餘名掣獲首從逆犯及各賊眷屬孩稚共  
三千餘口得獲牲畜糧食器械帳房無算此次剿  
滅賊巢滿漢官兵俱各振奮已圖魯侍衛等皆倍  
加出力俟查明再行分晰具

奏我兵因賊人冒死迎撲間有受傷者容查明造冊  
咨部

乾清門侍衛哲森保永德俱受石傷尚輕查逆回自  
其祖先以來食毛踐土蒙

國家養深恩者已百數十年與民人同隸編氓毫  
無區別乃敢聚衆鴟張攻城掠堡傷害官兵罪大  
惡極雖寸磔不足蔽辜是該犯等惡貫滿盈揆之  
情理必當生擒解送盡法處治以正

國憲而快人心但臣等將賊巢四面攻圍原無虞其  
竄逸而率兵攻撲該賊首或臨陣被殺或情急自  
戕均難預定今竟悉數擒獲並眷口俱全行就縛  
此皆仰賴

皇上洪福

上天嘉佑故能歲功如此之完善俟將首逆各要犯嚴切  
審訊再行分起派

乾清門侍衛巴圖魯侍衛章京等迅速解送熱河以  
備審訊再賊匪夤夜撲出官兵奮勇勦殺賊屍積  
滿溝壕難保無賊人自相踐踏乘隙竄出者現在  
首逆及各要犯雖已全數擒獲臣等不敢稍存大  
意派舒亮阿爾薩朗阿滿泰等帶同巴圖魯侍衛

章京率領馬兵分路搜拏並飭從前派出之各帶  
兵將領及各該縣一體堵截緝拏務期淨盡不致  
一名漏網至底店降回千餘人臣等現擬設法辦  
理俟一面查辦一面即將馬文燾嚴加鎖鑰交法  
靈阿解送熱河再石峯堡內臣等派員逐細搜查  
除牲畜糧食破爛衣服外餘無別物其堡上形勢  
實屬險峻但止有土牆一道溝壕三層並無別項  
備禦奏入

上諭內閣曰據阿桂福康安奏初四日石峯堡內投出老弱賊匪一千五百餘名阿桂福康安恐賊人詭譎伎倆希冀官兵見賊衆投出防範稍懈即乘勢撲出竄逸預派官兵層層分布埋伏預備初五日子刻賊首張阿渾果同楊填四等帶領賊衆向外直撲思欲奪路竄逃官兵鎗箭如雨盡力截殺戮賊千餘張阿渾等竄回堡內其時天色黎明福康安同海蘭察等帶領各官兵一湧而上進堡搜捕將首逆張阿渾即

張文慶大通阿渾即馬四娃並賊目楊填四黃阿渾  
即黃明馬建成馬良茂馬金玉楊存義馬建幾馬建  
業馬保全數擒獲兩日打仗殲擒賊回共二千餘名  
拏獲首從逆犯及各賊眷屬孩稚共三千餘口等語  
覽奏實深欣慰國家愛養黎元凡直省編氓遇有水  
旱灾荒無不立時蠲賑至甘省回民久隸帡幪食毛  
踐土便與齊民無異該省地方饒瘠間有不登即行  
蠲免賑濟較他省為尤多回民等同在編氓之中百



數十年仰沐膏澤家給人足伊等同有天良豈不當  
稍知感激且地方官並無苛求酷派激變事端乃逆  
回等敢于光天化日之下肆行逆謀實為國法不容  
神人共憤而前此李侍堯剛塔等辦理不善致賊四  
出勾結蟻聚滋蔓猖獗鴟張經朕特派大學士阿桂  
陝甘總督福康安先後帶領巴圖魯侍衛等前往督  
辦並諭以底店係賊匪門戶當先由該處以次進剿  
福康安先抵甘省數日之內即將底店賊匪剿辦淨

卷十四  
盡肅清後路俾賊衆聞風膽落萌蘖潛消阿桂抵石  
峯堡後復會同福康安遵照朕硃筆圈示之處安營  
設卡將賊匪嚴密圍堵並斷其水道辦理均為妥協  
且勦辦甫經一月即能將賊匪迅速殲除而賊首張  
文慶等俱悉數生擒並拏獲活口三千餘名不使有  
一人免脫此皆仰荷

上天嘉佑是以軍士用命俾該犯等惡貫滿盈按名生致  
盡法懲治而諸臣之歲功完善不可不特沛殊恩以

昭懋賞阿桂前于平定金川時已封頭等公爵現為  
大學士恩施無可復加著再予輕車都尉世職即令  
阿桂于伊子孫內揀選一人奏聞承襲福康安籌辦  
底店賊匪先得機宜較為出力前於平定金川時已  
封為嘉勇男著再晉封嘉勇侯海蘭察前在金川起  
衆奮勉已封侯爵今在甘省節次打仗復能首先帶  
領官兵奮勇殺賊前已加恩將伊子安祿擢授二等  
侍衛在乾清門行走著再給予騎都尉世職即令安

祿承襲五岱係塔爾巴哈台班滿回京之人路過甘  
省即自奏留該處協勦且於福康安未到之先在伏  
羌等處擊退賊匪頗為奮勉著授為都統亦予騎都  
尉世職其餘巴圖魯侍衛章京等及領兵各員分投  
勦殺兼有能不避矢石殺賊受傷者均屬奮勇可嘉  
所有此次勦賊受傷出力之帶兵大小各員弁著阿  
桂福康安查明出衆特等者及其餘出力之侍衛章  
京官弁兵丁等分別等第奏聞交部議叙以示獎勵

至此次勦辦回匪三月以來朕批覽奏章指示機宜  
和珅首承諭旨繕寫寄發巨細無遺一體宣勞和珅  
本身現襲輕車都尉著再給予輕車都尉世職歸併  
前職照例議襲其餘在事慶成之軍機大臣梁國治  
董誥福長安並軍機章京之勤勞出力者著一併交  
部議叙所有此次賞給各世職俱著世襲罔替其應  
如何議襲之處俱著該部查例具奏將此通諭中外  
知之

臣等謹案逆回世處隴右久隸編氓踐土食毛  
悒悒樂利百數十年仰蒙

國家厚澤深仁涵濡淪浹懷舊德而服先疇理宜耕  
鑿自安勉為良善乃敢于光天化日之下自外  
生成跳梁不靖竟至附和邪教糾合匪徒蟻聚  
鷓張攻城掠堡實屬罪惡貫盈神人共憤必當  
駢首寸磔盡法處治方足以正刑章而昭

國憲茲者

天戈所指未及決旬而賊首按名生致眷口悉數就擒良由秉承

睿算事事洞燭幾先掃底店則門戶先摧搗石峯則腹心自潰嚴圍堵而竄逸無虞斷水道而困憊益甚故勦辦甫經一月而奏捷若是其迅速歲功若是其完善洵乎

神謨遠燭勝握萬全凡軍營經畫所及早定算於聖明指掌中矣若乃郵章宣捷

頌尺酬庸大小將弁固已榮膺

懋賞至臣等夙邀

渥眷分應馳驅或身在行間或親承

籌筆凡皆仰仗

天威故克膚功迅奏何有微勞曲蒙

優叙敬誦

丹綸彌增感悚惟有與在事諸臣共深慶幸云

阿桂福康安又奏言查石峯堡係鞏昌府通渭縣



所管地方臣福康安到軍營後即詢據附近石峯堡居住之監生馬文遠稱石峯堡原係昔年舊有的堡子從前並無人居住乾隆四十六年三月有回民馬正芳馬壯等至堡內修理築牆挖窖隨有民人董有赴通渭縣知縣趙元德處控告差役查勘審訊不許回民修理將回民佔去地土審明分為三分一分斷給回民兩分斷給百姓後來縣官換了王懷董有等又去告過王知縣說此事已經

前任斡過何故又告就沒有准此事就沉擱下了  
等語臣福康安即飛飭署通渭縣知縣黃恩查送  
前後控告呈詞及斡過案卷嗣據該縣稟稱此案  
卷宗已被賊燒燬無存查前任知縣趙元德已於  
控災冒賑案內正法接任王懷失陷城池又復蔽  
匿倉房偷生無恥奉

旨即于該處正法以示懲儆因該犯已解至省城監禁  
隨即提至軍營臣等公同審訊據供四十七年八

月有縣民董有控告回民馬正芳馬壯等在石峯堡築牆挖窖霸佔地畝彼時我因此案已經前任知縣趙元德審訊將石峯堡及附近地土斷作董李馬三姓公業不許馬姓獨佔滋事各具甘結息訟已久就沒有准他後來董有因他的地土賣與回民馬正芳止剩場園意欲一并契賣馬正芳等扣勒不要又將前次修堡並向賣場園扣勒情節控告我委典史溫模前往查勘據稱回民築牆挖

害屬實我因回民安靜無事修理舊堡想不過要  
住家就未親往查勘亦未押令平鏟止斷令董有  
下剩場園著馬正芳承買完結各上憲處亦未稟  
詳這就是我昏憤糊塗該受重罪等語反覆究詰  
矢口如一臣等伏思王懷雖堅供未經稟報伊係  
身犯重辟之人焉知非自知必死以一身擔承為  
各上司卸責應將該犯暫留監禁有須訊問之處  
即將該犯同經手胥吏原告等解赴熱河質對俟

審明後再正法示衆至通渭縣向未設有專汛員  
弁嗣于四十八年十二月始議駐額外外委一員  
兵丁十五名咨部覆准在案所有應叅之文武各  
上司臣等現在詳查俟查訊明確即令一面嚴叅  
一面遵

旨拏問解赴熱河治罪奏入

上又命軍機大臣傳諭阿桂福康安曰阿桂等奏官兵  
勦洗石峯堡賊巢一摺已明降諭旨交部議叙矣至

張阿渾等敢于到處勾結匪徒肆行滋擾殺害官民實為罪大惡極前節次傳諭阿桂福康安將拏獲賊目詳悉嚴訊有供出黨羽即行指名出示拘拏治罪今賊首張阿渾等既全數擒獲著阿桂福康安即速向其詳悉跟究並隔別研鞫將供出匪黨指名出示拏獲嚴辦仍即將張阿渾等選派妥幹大員分起押解沿途嚴密防範迅送熱河嚴鞠治罪以伸國法而快人心又昨據奏到拏獲賊犯李自黨供稱田五是

馬明心的徒弟要替馬明心報仇所以造反等語田五縱欲為馬明心報仇遂思謀反而張阿渾大通阿渾等並非馬明心之徒何以亦敢四出勾煽匪黨安心作逆况底店石峯堡等處賊衆滋擾俱在田五自戕之後田五雖自戕即應查其緣坐亦不可漏其張阿渾等仍敢煽誘多人肆行擾害地方尤屬可惡現在賊目賊夥俱經拏獲著傳諭阿桂福康安將張阿渾等因何又思謀逆之處詳細嚴訊務令供出實情

勿致得有狡展至阿桂等奏賊匪夤夜撲出保無有乘隙竄逸者現派舒亮等分路搜拏及各州縣一體堵截緝拏等語所辦甚是要犯既全數搜獲即有二竄出之犯經官兵分路搜捕及各州縣分投截堵自當陸續就擒不致漏網况各處村庄被賊搶劫殺害懷恨已深如有餘賊潛逃到彼亦必當即時擒獻也又據奏四十六年三月有回民馬正芳馬壯等將石峯堡修理民人董有赴通渭縣知縣趙元德處控



告該縣查明回民佔去地土將一分斷給回民後來  
王懷到任董有又行控告王懷說此事已經前任斷  
結遂行批駁現將王懷及經手胥吏原告等解赴熱  
河等語趙元德已于前年監糧案内正法將來王懷  
解到審明後亦自當明正典刑但該犯等敢肆行無  
忌公然修理城堡逆跡昭然李侍堯係該省總督毫  
無見聞養癰貽患其罪固無可逭而該管之道府各  
員所司何事乃竟亦身同聾瞶茫無覺察豈此等重

大事件竟諉為該縣未經稟報伊等遂得卸罪耶著  
傳諭阿桂福康安查明該管道府係屬何人任內之  
事仍遵前旨解赴熱河審明治罪又前降諭旨令阿  
桂福康安于事竣後赴京兵及山陝各兵撤回之便  
就近親赴底店等處將賊人種種逆蹟詳細履勘並  
究出黨羽按名拏辦以淨孽種此時辦賊業經完竣  
阿桂福康安自能遵照前旨親往妥協辦理也

上又命軍機大臣傳諭阿桂福康安曰此次甘省逆回

滋事軍報往還最關緊要邇來正值伏暑大雨時行  
沿途驛站馳送文報並無遲悞今賊匪業經辦竣所  
有自熱河以至甘省驛站官員著該督撫等查明咨  
部並兵部捷報處章京一併議叙馳遞之弁兵人等  
並著酌予賞賚又京兵前往軍營協勦經過各省照  
料妥協俾得尚進無悞均屬可嘉其派出護送之官  
員等亦著該督撫等查明具奏交部議叙

同日阿桂福康安又奏言查伏羌縣之白馬庄馬

家坡等處前據該縣稟報有賊匪潛匿滋擾經臣  
福康安派令寧夏鎮吉蘭泰帶兵前往搜捕並續  
派川北鎮富祿帶兵一千名協同吉蘭泰分路查  
拏嗣據該鎮等陸續稟報于六月二十日帶領弁  
兵率同回民千總職銜白重焯前往白馬庄逐戶  
稽查拏獲自底店逃回之六指阿渾白重友伊子  
白雙喜二犯家屬男婦大小七名口并刀矛號衣  
等物二十四日在馬家坡各山僻處所搜獲隨賊

打仗及被賊裹去逃回之馬士元等十六名家屬  
二十四名口二十五日搜獲賊匪馬伏得等四十  
八名家屬一百三十六名口除賊匪家屬就近交  
伏羌縣監禁外其餘各犯節經解赴軍營當將從  
逆之犯審明即行正法其並未從賊逃匿被獲者  
俱交臬司嚴行監禁于事竣後再行研審辦理仍  
飭該鎮等再行實力搜查務期淨盡至靖遠縣白  
楊嶺等處竄匿賊匪猝將守備福泰等殺害一案

金史紀事本末卷之四十四  
六十四  
係六月初九日午刻之事彼時玉柱帶兵在荒草  
嶺一帶搜拏賊匪于酉刻行抵白楊嶺係屬兩路  
是以未及揀援但玉柱帶兵五百餘名勦捕賊匪  
四路追趕並未擒獲一賊臣等已令策卜坦查明  
該署副將玩悞緣由據實揭報俟查明後再行叅  
奏再李世傑所奏請赴軍營効力之原任總兵許世  
亨已于本日前至軍營現在飭令聽候差委俟川  
兵撤回時即令該員一同回川奏入報

聞

同日福康安又奏言查浦霖於前月二十日馳抵  
軍營臣福康安以省會地方關係緊要將應行籌  
辦軍需事宜詳悉告知令其赴省接印任事茲奉  
諭旨浦霖著調補安徽布政使其甘肅布政使員缺  
著陳步瀛補授汪新著調補甘肅按察使等因欽此  
查汪新到任尚需時日陞任臬司陳步瀛現馳赴  
靜寧督催各路糧運審辦賊犯事務較繁未便令

其回省道員中又無堪以委署臬篆之人應請令  
浦霖暫緩起程陳步瀛仍管理臬司事務奏入

上諭曰所奏與前日所降諭旨脗合甚屬可嘉

同日農起奏言臣于六月二十八日接阿桂福康  
安咨會大兵圍住石峯堡賊巢尅日蕩平原調山  
西兵二千名現奉

諭旨令福敏泰帶領撤回等因臣查福敏泰帶領之兵  
係在逼近賊巢之隴州一帶防守今既撤回則在



蒲州駐守之兵相距更遠似可毋庸再駐現已一  
并陸續撤回除令各州縣預備各兵過境外臣亦  
於六月三十日回省奏入報

聞

欽定石峯堡紀畧卷十四

欽定四庫全書

欽定石峯堡紀畧卷十五

七月十二日乙丑

上命軍機大臣傳諭阿桂福康安曰昨據阿桂等奏初五日黎明督率官兵進堡搜捕將首逆張阿渾即張文慶大通阿渾即馬四娃等全數擒獲等語張文慶等於黑夜之中思欲奪路遁逃經官兵截殺竄回堡內福康安等帶兵進堡搜捕時該犯等自知罪在不

赦宣肯甘心束手就縛着傳諭阿桂福康安即將搜拿張文慶馬四娃各犯時該犯等曾否抵拒官兵等係何人擒捕何賊並該犯等詢取供詞後何日起解之處迅速覆奏至該處善後事宜全仗阿桂福康安會同在彼辦理其海蘭察等即帶同巴圖魯侍衛等由駟馳赴熱河以備扈從

十四日丁卯延綏鎮總兵策卜坦奏言臣帶兵前往白楊嶺等處督拿賊匪於六月二十一日至靖

遠詢知賊人由鷹窩石又復他竄臣即一面差弁  
各路偵探一面令都司馬得先往白楊嶺鷹窩石  
一帶查看有無賊匪踪跡隨據署副將王柱稟到  
賊匪出沒無常詭詐多端兼之山深路險最易藏  
匿雖偵探尾追並未見賊臣即嚴飭該署副將等  
若僅如此尾追徒勞兵力與搜捕無濟隨即指使  
各領兵將備各佔要隘四圍搜捕以期迅速就獲  
臣即在糜子灘赴鷹窩石要隘處所駐劄搜拿旋

於二十七日拏獲賊回馬如務馬如龍二名又於二十八日拏獲馬六之子賊首馬守正訊據馬守正供稱糜子灘隨從逆回尚有五十人臣即令其供出姓名開單按名搜捕奏入

上命軍機大臣傳諭阿桂福康安曰現在石峯堡賊匪業經殲擒淨盡五岱因未得信是以又趕回石峯堡專留策卜坦在鷹窩石一帶搜捕該處賊匪既據馬守正供出姓名自無難按名緝獲其現獲之馬守正

馬如龍馬如務三犯即著選派妥幹員弁解送熱河以便審訊盡法懲治至玉柱帶兵五百餘名在鷹窩石捕賊即使賊踪詭詐多端亦應設法繞截擒拿何至徒事尾追並未擒獲一賊著傳諭阿桂福康安即將該署副將玩悞之處迅速據寔查叅

十七日庚午阿桂福康安奏言臣等連日親提各犯逐加鞠審並將節次拿獲各要犯田友李自黨等隔別研訊雖供詞不能確實相符臣等核其情

節緣田五張文慶俱係馬明心徒弟張文慶又係  
馬明心內侄田五交結往來已非一日馬四娃係  
大通人於乾隆四十二年出外遊學與張文慶相  
識一同誦念回經即在馬營居住又有老鴉溝地  
方之李可魁即李鬍子係李自黨之子向隨田五  
念經本年正二月間田五先與李可魁商同謀逆  
糾約張文慶及各回匪訂期於八月十五日起事  
欲與馬明心報復經回民李應得等到官舉首田



五等知事已敗露遂於四月十四日聚衆劫掠抗  
拒官兵經剛塔帶兵於狼山追剿田五中創身死  
餘匪逃散其時李可魁逃至官川馬營一帶藉稱  
官兵剿洗田民肆行煽鼓遠近回匪聽信附從四  
出焚掠而通渭縣逆回張文慶大通馬四娃同馬  
鬍子楊填四等亦於五月初五日在石峯堡糾衆  
肆逆互為應援攻打通渭伏羗等處回至底店糾  
合武舉馬文熹攻城掠堡扎營屯聚至六月十一

日大兵進剿底店李可魁在山梁被鎗打死所有賊營內精壯能打仗者多被殲戮馬文嘉率眾投出張文慶等始竄回石峯堡負固死守此逆回等起意謀逆及勾連煽誘先後各情節也此案渠魁以田五張文慶馬四娃三犯為首惡而李可魁馬鬍子為賊前鋒回匪與官兵接仗皆係該二犯率領抵拒自六月十一日李可魁在底店被鎗身死而逆回之氣沮三十日馬鬍子在石峯堡被鎗身

死而逆回之膽益落至張文慶與田五等如何往來約會輾轉糾結及於何時起意謀逆之處反覆究詰該犯等匿不供吐若加以刑鞫無難得實因係首惡要犯即應解送熱河未便遽加刑訊謹就該犯等供出大槩情形另繕供單先行奏

聞一面派定員弁分起妥解其賊目非甚緊要之犯仍酌留數名以便嚴切鞫訊詳細跟究至四十六年修理石峯堡一事前經<sub>臣</sub>等將通渭縣民董有具

控馬壯馬正芳及前後審斷緣由奏蒙

聖鑒但現提馬壯到案極口稱寃張文慶亦堅不承認及詰以何從知有此堡始行糾衆則稱此處附近地方有華陽窪馬姓回人一向熟識來往是以知有此堡而馬壯亦稱從前聞有華陽窪回民馬廷秀修理堡子之事是華陽窪馬姓回人必有通同勾結情弊現已飛飭查拏並提集馬正芳及承辦董有控案之書役等一併嚴行審訊徹底跟究再

臣等親至石峯堡上周圍看視係於山頂築土牆一道高七尺五寸厚四尺五寸堡外挑壕三層堡內土牆南北長六十三丈東西寬十五丈二尺並無房屋四面有窰洞百餘座因該處土性鬆浮不能開挖寬深每洞僅容數人<sub>臣</sub>等已飭令將壕洞填平牆垣拆毀再查賊首張文慶馬四娃二犯罪大惡極必應生擒寸磔以申

國法但大兵四面攻圍時難保無情急自戕等事<sub>臣</sub>

等正在設法籌辦時適有賊犯馬建幾到營懇求  
投出臣等隨諭以若能將賊首縛獻方可活命至  
初五日早晨官兵殲戮石峯堡撲出賊匪後堡內  
賊人已少馬建幾即與伊弟馬建業等將賊首擁  
逼出堡官兵迎上拿獲查馬建幾一犯業經從賊  
雖自行投出亦所不赦但賊首得以生致該犯亦  
有微勞可否原其一線之處伏候

聖裁

阿桂福康安又奏言查底店回民九百餘戶俱曾經從逆斷難容留彼時欲示寬大以廣招徠是以權宜允准留俞金鰲帶兵在彼彈壓俟事定後即行相機妥辦嗣據該提督咨稱底店附近村庄回民三百餘戶懇請回家收割田禾恐本庄及沿途村民認為賊黨致被擒拿求出示曉諭以便携眷回庄臣等咨覆令將該回民等住址名姓人口數目開具清單移送以便寫入告示曉諭百姓俟發

給告示後再行遣歸暫安各回民之心將來辦理時可以按冊稽查不至遺漏查石峯堡賊巢業已掃平首逆擒獲此時自以籌辦底店降回為要臣等公同商酌該處回民人數衆多若令海蘭察統率大兵前往聲勢太盛且海蘭察威名素著難保無聞信驚疑四散逃逸因思明亮尚能辦理此事而現在官階不過藍翎侍衛令與總兵興奎蘇靈同往不至駭人觀聽並酌帶滿漢官兵屯土兵丁



共三千餘名以往南山一帶搜捕餘賊為名前至  
底店先將該處所通各路偵探明悉于各要隘派  
兵分布埋伏堵截又令海蘭察帶同巴圖魯侍衛  
等前往遙為策應臣等面囑明亮至彼先令署隆  
德縣知縣朱爾漢傳集該處回民會同俞金鰲剴  
切曉諭以伊等前經從賊不無殺傷民人焚掠村  
舍之事此時雖已返正而附近村庄百姓或父兄  
子弟曾被殘害或廬舍糧畜曾被焚掠者皆銜恨

切骨見伊等回歸自必憤圖報復不能永遠相安  
今為伊等籌計現在各州縣逆回誅戮其空出房  
屋地畝甚多莫若將伊等遷移各該處撥給居住  
使被害百姓相隔遙遠庶免尋隙報復又起釁端  
如此明白宣諭若該回民等俯首順從即派兵分  
起解送隆德縣按名正法設或桀驁不服即督兵  
剿殺四面俱有兵堵截諒亦無從竄逃可期殲除  
淨盡至馬文燾所帶隨營効力回民百餘名已派

入各隊兵丁內帶往一體辦理現在止有馬文燾  
一犯臣等派員看守約計明亮到彼辦結即將該  
犯嚴加鎖鑰交與法靈阿押解起程均奏入

上命軍機大臣傳諭阿桂福康安曰據阿桂等所奏馬  
明心業經正法田五等尚復守其邪教且敢公然聚  
衆謀逆思為報復可見該犯等滋事不法總由爭教  
而起而舊教回民尚知安分守法自當妥為撫慰此  
時賊匪業經殲擒淨盡阿桂福康安等宜出示明切

曉諭即向曾學習邪教者亦應及早改悔勉為安分  
良民仍遵前旨嚴密查訪拿辦則邪教根株斷絕自  
不至再生事端至修理石峯堡係馬壯供係大馬家  
馬正芳華陽窪馬廷秀所修等語馬正芳馬廷秀已  
經阿桂等飛飭查拿現在曾否拿獲作何審辦又田  
友供出之黃鬍子阿渾塔掌教俱是馬明心徒弟田  
養和馬自成等俱在田五家商議事情曾否一併拿  
獲審辦再馬四娃之兄馬三娃據供在營食糧此人

現在何處曾否到過賊營俱應詳細查明即使未到賊營馬四娃係賊中首犯其兄亦應緣坐不可寬縱其馬建幾一犯與伊弟馬建業等將賊首擁逼出堡得以生擒尚可原其一綫但該犯究經從逆亦未便遽擬發遣將來或可免其死罪牢固監禁俟解到時再行定奪也又張文慶供五月初四日本縣差役張金到庄上叫我父子我悄悄問他究係何事他告訴我說你去總是有去無來我曉得這事不好就躲

過了等語張金身充縣役奉差往喚張文慶乃以有去無來之語私相告知且該犯本係回人又與張文慶同族認識故為透露消息顯屬知情縱逆何以阿桂福康安未經辦及著傳諭阿桂等即速提張金一犯從嚴審辦至張文慶之子張太暨掌教張樂等先經通渭縣拿獲後楊填四帶領賊衆攻擾通渭該縣王樓便將伊子張太及掌教張樂等從城上放下此事實出情理之外張太等既經拿獲當賊人攻城緊

急時若慮其搶奪亦當即予正法何得輒行放還王  
悽懦怯憤事至此已極現據解送熱河俟解到時應  
將伊縱賊之處一併審明再行正法再張文慶供在  
伏羗被官兵擊敗竄回底店糾合馬文熹那時馬文  
熹已經打了靜寧州通邊鎮回來我們遂與馬文熹  
合在一處等語是馬文熹業經攻犯州城通同肆逆  
罪無可逭其在縣具呈及跪道乞降不過見大兵勢  
盛自為脫罪地步尤屬狡詐可惡必應審明嚴辦其

底店從逆回衆亦俱不可赦宥據阿桂福康安奏派委明亮前往諭令伊等移徙居住若該回民俯首順從即分起解送隆德按名正法設或桀驁不服即督兵勦殺等語自當如此設法辦理明亮至彼察看回民情形若何此時曾否妥辦完竣具報著即迅速奏聞至石峯堡既無房屋可居亦不必再議駐兵應如所奏即將壕洞填平牆垣拆毀并交該地方官不時稽察勿任私有佔據又土司楊宗業隨同打仗尚屬



出力著賞給大緞二疋以示獎勵

同日阿桂福康安又奏言臣等欽奉

上諭此案剛塔之罪尚輕於李侍堯著傳諭阿桂再會同福康安秉公詳查務歸至當以憑定讞欽此查回民於四十六年脩理石峯堡乃三月內之事嚴訊馬壯父子等據供彼時因撒拉爾逆回滋事地方官諭令鄉民各修村堡我們住在蔡家堡那時也曾脩過至石峯堡係華陽窪馬廷秀等修理等語

雖該回民等修堡或防撤拉爾或預存謀逆之心  
均未可定但其事在四十六年三月尚在李侍堯  
未到甘省已前至四十七年八月董有又將回民  
脩堡佔地情節控告該縣王懷視為田土細故前  
官已經斷定並未審訊亦未詳稟是李侍堯於回  
民脩理石峯堡尚無知而不辦情事至逆犯倡亂  
滋事臣等細加訪詢皆因李侍堯於查辦新教一  
事地方官奉行不善胥役又從中勒索滋事擾致逆

回得誑稱剿洗回民藉詞煽誘到處勾連但田五等蓄謀圖逆已非一日至本年正月田五輾轉糾約距四月內被李應得等首告之時已經數月李侍堯安坐省城毫無聞見身任封疆重寄而漫無覺察貽患養癰其罪實無可諉迨賊首田五已斃餘黨竄入馬家堡剛塔等帶兵追趕李侍堯惟株守靜遠審辦賊匪家屬以至軍營無人統攝全不知攻剿機宜賊匪得乘間翻山而逸及屢奉

諭旨嚴加訓飭始至伏羌軍營督率將弁與賊打仗將賊擊退於雲霧山等處連次克捷追賊直至底店使李侍堯早至軍營賊匪必不至鳴張若此是其從前逗遛觀望之罪難逃

聖明洞鑒至剛塔補授固原提督甫經到任田五即被首舉事剛塔帶兵剿捕射賊受傷追至狼山馬營水殺賊二百餘名田五傷重自戕其時餘賊不過八九十名使剛塔奮勇追剿即可及早完結乃馬

家堡為賊所誑致令翻山逃竄各處賊衆遂紛紛  
接應四出滋擾雖在後竭力尾追打仗亦屬勇往  
而其毫無籌畫以致賊勢蔓延剛塔亦不能無罪  
奏入

上諭曰公論俟審明有旨

同日阿桂福康安又奏言前因初五日賊匪晝夜  
撲出恐有帶傷乘隙逃竄者臣等不敢以首逆及  
各要犯全數就獲稍存大意當即令海蘭察踣者

賊踪約計竄出者有二三百人隨派舒亮等帶領馬兵分路搜拿並飭前經派出帶兵將領及附近各州縣一體堵截據各該鎮將及地方官等陸續具報擒殺賊匪並各村庄百姓拏獲送至軍營者共一百五十餘名臣等擇其中稍悉賊情之犯飭令解赴軍營以備審訊餘犯俱令於該處即行正法現仍嚴飭緝拿不使一名漏網至首逆張文慶馬四娃及要犯楊填四等現派侍衛章京將該犯

等分作三起擬於十一二三等日分起押解起程  
前赴熱河至從前所獲馬世忠劉天祿馬成格惠  
明見四犯現已飭令臬司陳步瀛即行正法

阿桂福康安又奏言查前經伏羌縣稟報該縣白

馬庄有賊匪竄匿臣福康安以敷倫泰駐劄沂隴

相距不遠調令就近查辦嗣經派吉蘭泰帶兵前

往會同富祿搜捕而福敏泰又已撤兵回任是以

仍令敷倫泰在彼暫駐今賊匪已平沂隴一帶無

需堵截<sub>臣</sub>等現已飛咨該副都統即行撤兵回任  
至白馬庄餘賊據該鎮等稟報陸續拿獲一百二  
十餘名可期淨盡再第五起續調京兵未至軍營  
石峯堡賊匪業已剿洗完竣<sub>臣</sub>等即令在隆德靜  
寧兩處暫駐以備接應俟將底店回民辦畢仍飭  
原帶童京分起陸續緩程回京均奏入報

聞

同日阿桂福康安奏言此次勦賊大兵雲集所有兵丁



口糧馬匹料草經臣嚴飭藩臬兩司及該道府上  
緊督催趕運查石峯堡軍營陸續運到糧數十萬  
石甚屬充裕現在大兵已將石峯堡賊匪剿除淨  
盡首逆就擒各路官兵可以漸次撤回無須多糧  
支給至派往各處搜捕賊匪官兵其口糧仍從軍  
營運往未免勞費臣前已預飭各該地方官凡兵  
到之處係某州縣所屬即令該州縣辦糧供送以  
省轉運之煩所有各州縣應運糧石未經起運者

現已飛飭停止運送在途者即令轉回其營中堆貯軍糧若仍復運回各該州縣長途腳費又多一倍支銷臣現飭藩司查明應行撫卹酌給口糧各村庄即以此項糧石就近撥運庶運價不至多銷貧民藉資口食實為兩便至火藥鉛彈現亦存積甚多俟查明各營有缺乏者即撥給收貯總期各歸實用不至濫費虛糜奏入報

聞

十九日壬申

上命軍機大臣傳諭阿桂福康安曰現在石峯堡賊回業已擒剿完竣其底店從逆回民亦據阿桂等奏派令明亮等帶兵前往設法剿洗想此時亦已辦理就緒惟閱阿桂等奏到拿獲各犯供內如馬營海城官川草芽溝蔡家堡朱家河馬家大庄老鴉溝以及小山底店鷹窩石各等處俱係逆回起事地方所有各該處回民謀逆及從逆者以次辦竣其空出房屋田

地例應入官變價但招賣時無論新舊教回民概未便仍令承買執業居住著阿桂福康安查明各該處空出房屋田地招令甘省漢民分戶認買移居倘因房產數多驟難變售不妨少為估價俾貧民得利自必踴躍承買如甘省民人承買之外尚有餘剩房產福康安現係陝甘總督即可令附近甘肅之陝省民人出資認買庶此等地方皆為漢民居住更易彈壓著阿桂福康安即遵照酌商妥辦

二十一日甲戌

上命軍機大臣傳諭阿桂福康安曰前因查辦賊黨時若輟轉跟究未免人數太多曾傳諭阿桂福康安止可向現獲賊犯研鞫如有供出黨羽即指名拏辦不必向續拿之犯再令輟轉供扳昨據阿桂等奏到首逆張文慶等供詞其所供出李芝安等各犯均已經官兵殲斃此外惟黃阿渾哈掌教等犯係其扳引供出已有旨令阿桂等速拿嚴辦現在張文慶等業經

起解其各處黨羽阿桂等已無從向訊或所獲賊衆  
內尚有平日通同商謀足備訊問者如尚未正法自  
應向其覆加嚴鞫有供出黨羽即當拘拿嚴辦朕之  
屢諭阿桂福康安辦理善後事宜時將賊黨多加殲  
戮者原以蘇四十三甫經剿滅田五等又胆敢聚衆  
滋事不可不趁此兵力剷絕根株但若輾轉跟究伊  
於何底亦非綏靖地方之道阿桂福康安素稱能事  
且又目覩該處情形所有此事應如何結局自必預

為籌及現在作何商辦務須通盤籌畫迅速據實具奏福康安係該省總督阿桂係朕特交辦理自不肯再貽後患即朕亦不過欲該省地方永遠寧謐並非必令輟轉跟究以致蔓引株連阿桂福康安自能仰體朕不為已甚之意也

二十三日丙子阿桂福康安奏言查底店曾經從  
逆回民九百餘戶共男丁一千數百名臣等酌派  
明亮同興奎蘇靈帶兵前至底店辦理隆德縣本

有續到京兵五百名在彼暫駐以備接應臣等又  
派三等侍衛蘇靈阿前往會同護軍統領善德安  
為預備嗣據明亮報知於初九日至底店初十日  
即傳集該處回民明切曉諭該回民等俱稱情原  
遷移當即諭令各歸收拾並許攜帶眷口同行使  
之不疑一面令興奎馳赴隆德會同善德蘇靈阿  
嚴密預備並檄調靜寧所駐之滿兵五百名前至  
隆德協同防範臣等即飛飭駐劄靜寧之京兵五



百名迅速赴調即於初十日明亮等在底店酌分起數派兵陸續解送明亮蘇靈等帶兵在後押護以防竄逸於是日晚齊至隆德十一日清晨酌分數處派兵嚴密防衛即一面點名一面正法至日晡全行辦竣共正法回民一千二百六十八名凡從逆匪徒以次就戮並無一人漏網至該回民等婦女幼孩共有二千五百餘名口容俟查明遵旨分別辦理其馬文燾親丁九名律應緣坐俱已正法

現在止有馬文燾一犯臣等業已嚴加鎖鑰交與  
法靈阿押解起程

阿桂福康安又奏言查馬文燾於底店率衆投  
順時臣福康安曾面訊該犯以伊名列武榜身受  
國恩何竟甘心從逆據供實係被賊逼迫無奈順從  
曾於五月十七日將危急苦情稟過隆德縣等語  
彼時欲權示寬大以安其心故未深加究詰即將  
匿稟不報之隆德縣知縣鍾潤叅

奏嗣據靜寧州知州涂躍龍稟稱五月十四日拿獲  
奸細楊五十三訊係石峯堡賊人差令前赴底店  
通信告知石峯堡賊人於十八日到底店入夥等  
供旋聞該鎮回衆於十五日移住山上當即稟明  
臬司並差傳武舉馬文燾赴州面諭並令在城居  
住之回教武舉馬人龍前往曉諭慰安馬文燾堅  
不赴州果於十九日石峯堡賊匪即至底店糾約  
馬文燾及該鎮回民入夥隨據底店附近村庄通

邊鎮曹務鎮等處紛紛稟報刦掠焚燒二十五日

逆賊圍攻州城賊首即係馬文燾合州共知等情

臣等查閱該犯原稟內有隆德衙役在鎮散布流

言大兵現在剿捕盡滅燾等命在眼前無奈遷逃

墩臺山安居等語而訊其衙役係何姓名則又不

能指出誠如

聖諭明係該犯甘心附賊故投此稟以為日後被獲時

卸罪地步且底店係靜寧州所屬而該犯在隆德

逃稟自係因該州屢次遣人傳諭不從底裏畢露  
無從掩飾而隆德縣猶可以虛詞恐嚇其鬼域伎  
倆尤屬顯然今臣等研訊之下該犯雖不肯將平  
時與賊勾通及攻城掠堡各情節據實供吐而反  
覆究詰俯首無詞且首逆張文慶曾有到底店時  
馬文燾已經焚掠通邊鎮回山之供彼時因該犯  
尚未拿回故未令質証俟解到當面質對諒該犯  
亦無從置辨至叅革隆德知縣鍾潤於馬文燾投

稟時理應通稟上司設法速辦乃因循不報自有  
應得之罪臣福康安已派員將該犯解送熱河聽  
候審訊均奏入

上命軍機大臣傳諭阿桂福康安曰阿桂福康安奏底  
店從逆回匪於初十日明亮等派兵陸續解送隆德  
十一日一百點名一面正法共正法回民一千二百  
六十八名等語匪徒駢首就戮人數太多朕心深為  
不忍此實劫數使然亦伊等孽由自作也至馬文燾

一犯前經靜寧州傳喚赴州曉諭堅不前往甘心從賊復敢率領賊衆圍攻州城肆行劫掠繼又至隆德縣具稟因衙役散布流言無奈遷逃墩臺山上預為後來被獲卸罪地步實為罪大惡極其居心尤屬奸詐俟解到時自應審明盡法辦理

同日

上諭內閣曰前據阿桂福康安奏逆回此次滋事由田五張文慶李可魁等俱係馬明心徒弟本年正二月

間田五先與李可魁商同謀逆糾約張文慶及各回  
匪訂期起事欲與馬明心報復等語可見田五等滋  
事不法總由爭教而起該犯等俱係內地回民自其  
祖先以來食毛踐土蒙國家豢養深恩者已百數十  
年同隸編氓毫無區別乃馬明心以邪教魁首甫經  
正法田五等尚復私守其教且敢於光天化日之下  
聚衆鴟張私為報復不法已極今石峯堡賊匪業經  
殲擒淨盡其底店從逆回匪據阿桂福康安奏該犯



等曾經攻擾城池搶掠百姓法無可宥是以遣員往辦亦已辦理完竣此外凡屬邪教回衆本應徹底跟究但念此次逆回滋事經官兵殲戮及拿獲正法者人數已復不少雖係該犯等孽由自作朕心寔覺惻然不忍且恐輾轉查辦或至良善回民波及株連更非朕不為已甚之意是以格外施仁除審明實係平日與逆犯等通同謀逆者查拿治罪外其餘緊免追究予以自新回民等務須革面洗心遵守爾等歷來

舊教各安生業永享昇平之福况田五等糾衆謀逆  
不過欲倡復新教試思新教起於馬明心馬明心及  
身既正刑誅妻子靡有孑遺從其教者為蘇四十三  
蘇四十三則又經官兵殲斃妻妾子女槩予駢誅今  
田五張文慶馬四娃李可魁等謀興新教復經官兵  
拿獲身膺寸磔閭家俱緣坐正法是新教不但與回  
民無益且至喪軀破家其禍尤烈回衆等因何甘為  
所愚執迷不悟受其流毒若經此次寬免之後尚有

陽奉陰違或敢滋生事端則是自外生成斷不能復為曲貸著阿桂福康安即將此旨謄黃普貼出示曉諭凡屬良善回民益宜安分守法即有向從邪教者亦當觸目警心及早改悔勉為順化良民毋負朕法外施仁諄切誠導之至意

臣等謹按回民自蘇四十三構逆創懲未久仍敢附從新教滋擾不法如底店及石峯堡兩處賊匪經官兵迅即掃平首惡之田五張文慶馬

文燾等或鎗傷立斃或檻送磔誅其黨逆不逞  
之徒亦皆斬首殲戮

天道之彰著與

國典之森嚴足為不靖者永昭炯鑒我

皇上除惡務盡復慮蔓引株連屢降

諭旨免其輾轉跟究俾得自新仰見格外

恩施不為已甚之至意而於新教之流毒貽殃諄諄

垂誠惟恐愚氓迷替自外生成凡在血氣心知之屬有

不發蒙而震贖者乎

同日阿桂福康安又奏言本月初五日據靖遠縣知縣稟報糜子灘民人拿獲賊匪馬守正一犯訊據供稱父親馬六即馬世教前隨同田五攻打靖遠城因田五在狼山打仗身死餘賊逃散馬六同了百十多人竄往鷹窩石藏躲經官兵追捕同夥投河死了許多剩有六七十人一同逃走總不過在黃河北岸大山躲避前月初九日馬六等在白

楊嶺地方藏著見有官兵到彼搜尋緊急隨撲出  
與官兵打了一仗傷了三三十個官兵連夜逃至  
山岔無路處藏著今因要往糜子灘搶些吃食被  
庄民拿獲現在我們只有五十餘人名字我都知  
道等供並據該縣將供出賊匪名字開單呈送查  
該犯所供賊匪止五十餘人俱在黃河北岸大山內  
藏躲之語雖未可盡信但既據開出姓名自可從  
此踪跡搜拿切實跟究隨將該犯供出名單飛移

五岱等上緊查拿並行令安定等縣及帶兵搜捕賊匪之鎮將等一體搜緝去後據防守馬家堡副將阿穆呼朗稟報在馬家堡地方拿獲賊匪二十六名內有名單所開馬世林等四名又據五岱等報稱玉柱等在蓼馬灘拿獲賊匪二名殺死七名當即令該處老教回民逐一認識據稱殺死賊匪七犯內有一犯委係馬六即馬世教又遊擊德明阿蘭發甲等亦於該處拿獲賊匪十名此外遍加

搜尋白楊嶺鷹窩石一帶並無藏匿賊匪等語臣  
等查鷹窩石餘黨訊據拿獲賊匪供稱馬六即馬  
世教實為首犯今雖據該處老教回民識認委係  
殺死但是否確實尚須提現獲各犯嚴切審究且  
恐潛匿餘匪未能搜獲淨盡現仍移咨五岱等令  
其督飭將弁再行分兵實力搜捕

阿桂福康安又奏言竊照賊巢掃蕩逆惡殲除底  
店回民一千二百餘名業經按名正法所有各路



官兵應酌量分起撤回查續派京兵一千名臣等前因石峯堡將近歲事隨行令善德等在隆德靜寧分駐嗣後一齊調至隆德今酌定仍分四起令善德帶領頭起於十五日起程此後間日一起行走復興帶領第四起回京其先派京兵一千名亦分四起令舒亮帶領頭起阿爾薩朗帶領末起陸續起程回京土司楊宗業番兵撤回經由洮岷係與四川屯土兵丁同路恐途間擁擠滋事是以先

令揚土司兵於十三日起程撤回其川省屯練土  
兵仍分四起俟三五日後令成德等帶領由鞏秦  
階原路撤回西安滿軍及軍標兵丁令永鐸帶領  
於京兵行走空日起程撤回涼州莊浪滿兵令圖  
桑阿等帶領撤回臣福康安已通飭陝甘二省各  
屬妥為照應先期備辦無誤應付並行文各該督  
撫一體預備支應至臣福康安自攻剿底店後即  
派阿爾薩朗噶他布吉蘭泰富祿等帶領官兵分

路前往伏羌秦安通渭安定會寧等所屬各村庄  
搜捕餘匪查拿從逆黨羽並通飭各州縣嚴行查  
緝嗣後陸續具報拿獲賊犯約千餘名及剿滅石  
峯堡賊巢後竄出賊匪約有二三百人臣等又添  
派舒亮永安阿滿泰許世亨帶同巴圖魯侍衛章  
京等率領馬兵分路追拿並嚴飭各州縣營汛一  
體實力緝捕隨據各處報到搜獲賊匪約二百餘  
名今當官兵撤回之時臣等復派保寧富祿帶領

四川應撤綠營官兵二千六百名由馬營通渭伏  
羗秦安等處會同文職大員再行逐細搜捕俟查  
緝完竣即順路從兩當徽縣入陝西畧陽境撤回  
與屯練土兵各為一路不至擁擠又丁憂壽春鎮  
總兵袁敏於本月十三日來至軍營臣等派令協  
同保寧等前往搜捕順便回伊四川原籍又阿拉  
善兵寧夏滿兵各留二百各同甘肅提標綠營兵  
八百名令旺沁班巴爾同閏正祥帶領前赴固原

鹽茶一帶會同地方官再行嚴切查拿其餘阿拉  
善寧夏滿兵一千三百餘名令先行飭回又派副  
將觀音保帶領綠營官兵前往華亭會同地方官  
實力查緝至甘肅本省及興安延綏並老教土兵  
暫行留駐俟應撤時全數撤回如此再四搜緝逐  
處查辦賊匪餘黨可期殲除淨盡並令各領兵大  
員俟搜捕完竣自信實無餘匪藏匿即報明臣等  
再行各歸本處營汛均奏入報

聞

欽定石峯堡紀畧卷十五